



# PRESS SECRETARIAT

MINISTRY OF THE PRIME MINISTER & CABINET

Apia, Samoa

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: [presssecretariat@samoa.ws](mailto:presssecretariat@samoa.ws)

Press Release

4 Setema 2008

## 1. Malaga Minisita o Faamasinoga i Hong Kong.

Ua faamaonia e le Kapeneta le malaga atu o le Minisita o Faamasinoga, Afioga Unasa Mesi Galo, i se Koneferenisi e faia i Hong Kong mai le aso 24 – 26 Setema 2008.

O le lona tolu ai lenei o fono a le Atu Asia ma le Vasa Pasefika e auala i le feagaiga na osia i The Hague, ma o le a talanoaina ai mataupu tau tulafono faavaomalo. Efai ma faavae o talanoaga o lenei fono ia galuega ma faatinoga a fono sa faia muamua i Meleisia (2005) ma Ausetalia (2007).

O lenei malaga o loo faatupeina mai e le Malo o Saina pasese faapea ma faletalimalo. O le a malaga faatasi le Afioga i le Minisita ma le Ofisa Sili o le Matagaluega o Faamasinoga ma le Faafoeina o Tulaga Tau Faamasinoga, le Susuga Masinalupe Tusipa Masinalupe.

## 2. Lipoti Fono i Niue.

Ua faamaonia e le Kapeneta le lipoti o le Fono a Taitai o Malo o le Pasefika, lea sa usuia i Niue mai le aso 19 – 20 Aokuso 2008. O le usugafono a Samoa, sa Taitaimalaga ai le Afioga i le Palemia, le Susuga Tuilaepa Sailele Malielegaoi.

O mataupu sa laualugaina ma iloiloaina i lenei fono e aofia ai le mataupu ia Fiti; Pacific Plan; tuufaatasia o faalapopotoga e aofia ai le SPREP, FFA, ma le SOPAC i lalo o le Secretariat of the Pacific Commission (SPC); Fesuaiga i le Tau; ma le tofia o se Failautusi o le Forum.

I le mataupu ia Fiti, na faalia ai le le fiafia o Taitai o le Pasefika ile le auai mai o le Palemia le tumau o Fiti, le Susuga Frank Bainimarama, i le fono e faamatala ai mafuaaga ua le faataunuuna ai faigapalota a le Malo o Fiti i le kuata muamua o le 2009, e pei ona ia faalia mai i le fono i Tonga i le 2007.

Na faatauaina e Taitai le galulue faatasi o atunuu o le Forum ma isi Malo ina ia faataunuuna faiga palota a le Malo o Fiti ae lei maea le kuata muamua o le 2009 ma o le a nofo sauni foi atunuu o le Forum e fesoasoani ia Fiti mo lea faamoemoe. Ua faapea foi ona pasia e le Forum le faauuina o galuega o le komiti faaminisita mo fesootaiga ma le Malo o Fiti i fuafuaga ma tapenaga mo le faigapalota, ma e aofia ai le taloina o se fono faapitoa a Taitai o le Forum i le faaiuga o le tausaga nei e soalaupule ai ni faasalaga mo Fiti, e aofia ai le faatea ese o Fiti mai le Forum pe a le faataunuuna a latou faiga palota i le kuata muamua o le 2009.

Sa talanoaina foi i lenei fono se lipoti ua taua o le Regional Institutional Framework, lea e agai i le tuufaatasia i lalo o le Secretariat of the Pacific Commission (SPC) faalapotopotoga e i ai le SPREP, FFA, ma le SOPAC.

Na talanoaina foi e Taitai le mataupu i le Atu Solomona ma le RAMSI, ma na matauina ai e Taitai le solosolo lelei pea o sootaga a le Malo o Solomona ma le RAMSI. Ua pasia nei e le Malo o Solomona le lipoti mo le faaleleia o le RAMSI, faapea ai ma le faatuina o se komiti faapalemene a Solomona e galulue faatasi ma le RAMSI faapea ma atunnu o loo i ai a latou fitafita ma leoleo i lenei polokalame. Na talia foi e Taitai se ofo mai le Malo o Iapani e fesoasoani mai i le RAMSI, ma ua taatia atu i le Failautusi o le Forum e fesoatai ma Iapani i lea mataupu.

I lenei fono sa tofia ai e Taitai a le Pasefika le Sui faatu a Samoa mo le tofiga o le Failautusi o le Forum, le Susuga Tuiloma Neroni Slade. O le Susuga ia Tuiloma o le Samoa muamua lea ua avea ma Failautusi o le Forum talu ona faavaeina le Forum i le tausaga 1971.

I lalo o le Pacific Plan, e aofia ai mataupu i le siisii pea o tau o meataumafa faapea ma le suauu. I lea mataupu, na pasia ai e Taitai le faia o se suesuega i le aafiaga o atunuu taitasi o le Pasefika, e talosaga ai le fesoasoani o faalapotopotoga mai fafo i lea mataupu. Sa faamalosi foi e Taitai le galulue faatasi o atunuu o le Pasefika i ni auuala ma metotia e faaitiitia ai le faalagolago o atunuu o le Pasefika i le suauu mai atunuu i fafo.

Sa faailoa mai foi e le Palemia o Ausetalia le amatalia o se polokalame faaaitaitai mo tagata Pasefika faigaluega faavaitaimi i totonu o Ausetalia e pei o le polokalame a Niu Sila lea o loo ave atu ai tagata faigaluega mai le Pasefika. O lea polokalame faaaitaitai a Ausetalia e lua tausaga o le a faatino ai ma e aofia ai tagata faigaluega mai Tonga, Vanuatu, ma Kiribati, ma ua maea foi ona tuuina atu se talosaga i le Palemia o Ausetalia mo le ofi atu o Samoa i lea polokalame.

O isi mataupu sa talanoaina e Taitai o le pasia lea o se folasaga i le Fesuaiga i le Tau, faapea ma le talosaga a Wallis and Futuna e avea latou ma Sui Lagolago o le Forum. O loo avea Wallis and Futuna ma Sui Observer o le Forum i le taimi nei.

Sa faapea foi ona lagolagoina e Taitai se pepa mai le Palemia o Samoa e talosagaina ai au lakapi a le Pasefika e ofi atu i tauvaga a le SANZAR, atoa ai ma le avea o le lakapi o se taaloga o le Olimipeka.

Sa malaga faatasi le Afioga i le Palemia ma le Pule Sili o le Matagaluega o le Vaifafo, o le Pule Lagolago o le Matagaluega o le Vaifafo, faaopea ma le Sui Faatu a Samoa mo le Tofiga o le Failautusi o le Forum.

### **3. Tatalaina Aloaia o le CT Scan.**

Ua faamaonia e le Kapeneta le tatalaina aloaia o le polokalame mo le CT Scan i le Aso Faraile, 5 Setema i le itula e lua (2:00pm) i le afiafi.

O lenei poloketi sa faatupeina uma mai lava e le Malo o Saina, faatasi ai ma le masini o le CT Scan ma ona totogi uma. Sa faatupeina foi e Saina le aumaia o se alii tomai faapitoa mai Saina e faafoeina le faaaogaina o lenei masini. Ua faamatuu atu foi se alii sinia o le Vaega o Faata e galulue faatasi ma le alii mai Saina ina ia tele se tomai e maua mai ai i le faatinoga o lenei masini fou.

Ua faamautu uma galuega mo lenei poloketi ma uma maea foi le faagaioioi o faataitaiga o lenei masini i ona vaega eseese, ma ua matauina ai le lelei atoatoa o lenei masini.

### **4. Fono Mataupu Tau Suavai a le Pasefika**

Ua finagalo le Kapeneta mo le faia o se faaafe a le Malo e tatala aloaia ai le Fono a le Faalapototoga o Mataupu Tau Suavai a le Pasefika mai le aso 9 – 11 Setema 2008.

Sa faia se faaiuga a le Komiti Faafoe a le Faalapotopotoga a le Pasefika i Mataupu Tau Suavai e siitia ese mai le nofoaga tutotonu a le Pacific Water Association (PWA) mai Fiti, a e faavaeina mai i Samoa. Ua tuuina atu foi se valaaulia i le Minisita o le Pulega o Suavai a Samoa e tatalaina aloaia lenei fono.

O le taimi muamua lenei i le tala faasolopito o le PWA o le a faia ai se fono tele i mataupu tau suavai a le Pasefika. O lenei fono o le a faia faatasi ai ma le fono faaletausaga a le Faalapotopotoga e faatatau lea i le suiga o tofi.

O le Faalapotopotoga a le Pasefika i Mataupu Tau Suavai sa faavaeina i le tausaga 1995. O le faamoemoe o lenei Faalapotopotoga e mataitu ai le lelei o le faatinoga o galuega a Matagaluega uma ma Faalapotopotoga Tau Suavai i le Pasefika, faapea ai ma le faamalositia o le galulue faatasi o ia Faalapotopotoga a le Pasefika e fetufaai tomai ma agavaa e siitia ai le tulaga tau suavai i le Pasefika.

### **5. Gasegase e auina atu i fafo.**

Ua faamaonia e le Kapeneta le auina atu i Niu Sila o se tamaitai i le gasegase o le fatu mo suesuega atoa ai ma ona togafitiga. O le a malaga faatasi lea tamaitai ma se tamaitai fomai aua tulaga faapitoa o loo moomia e le tamaitai ua gasegase.

O loo tumau pea le faiga faavae a le Malo i lona tauaveina o totogi mo suesuega faapea taotoga ma togafitiga, a e totogi e le gasegase lava ia lona pasese i le malaga atu ma le toe taliu mai.

**6. Faasuafaina o le Maota Fou o Sui Usufono o le Palemene.**

Ua faamaonia e le Kapeneta le faasuafaina o le maota fou o Sui Usufono o le Palemene i le Suafa, Tofilau Eti Alesana.

O lenei fuafuaga o loo gatasi ma faiga faavae a le Malo o Samoa e faasuafaina ai maota taua ma le iloga i suafa o taitai o le Malo e pei ona i ai maota gasegase i Motootua ma Tuasivi faapea ma le fale o le Malo i Matagalalua.

O loo fuafua e tatalaina aloaia lenei maota fou i le Aso Lulu 17 Setema 2008, ma o le a taua o le, “Maota o Tofilau Eti Alesana”.

**7. Malaga Loia Sili i Vanuatu.**

Ua faamaonia e le Kapeneta le auai atu o le Afioga i le Loia Sili, Susuga Aumua Ming Leung Wai, i le Fono mo le Toe Fuataiina o Tulafono a Sooupu tau Ausetalia e usuia i Vanuatu, 10 – 12 Setema 2004.

O mataupu e lauliliuina i lenei fono e aofia ai le toe faatulagaina o tulafono (law reform) e patino tonu lava ma talafeagi ma le si’osi’omaga o le Pasefika. E faapea foi le fesoasoani o silafia ma tomai o i latou o loo gafa ma le fauina o tulafono i totonu o le Pasefika aua se lumanai lelei mo atunuu o le Pasefika.

O le a saunia foi e le Loia Sili le pepa mo lenei fono ua faaulutalaina, “**A New Law Reform Commission for Samoa**”.

O loo totogiina e Niu Sila tau o femalagaiga mo lenei fono.

**Government Press Secretariat**